

HEADLINES (EVENING)

Date – 29/10/2024

Time - 18:30 -18:40Hrs

- Ramchhung hmun dang rualin vawiin khan National Ayurveda Day vawi 9 na chu Mizoramah Larsap Dr. Hari Babu Kambhampati hovin hman a ni.
- Chief Minister Pu Lalduhoma'n Mizoram sawrkarin renchem taka sum a enkawl avangin Ba tam tak an pe thei a ti.
- Prime Minister Narendra Modia chuan vawiin khan Rozgar Mela-ah sawrkar hna hmu thar mi sing 5 leh sang 1 te hnenah appointment letter a hlan.
- Prime Minister Narendra Modia chuan vawiin khan New Delhi atangin health sector kaihnawih hmasawna project cheng vaibelchhe sing khat sang hnih leh 850 hu a hawng.



9TH NATIONAL AYURVEDA DAY

Larsap Dr Hari Babu Kambhampati an Mizoram chu ramhmul damdawia hausa tak anih thu leh, hei hi hman tangkai chuan Mizoramah damdawi thiamna hmanga tihdam hnathawh nasa takin a tichak thei a ti.

Vawiina National Ayurveda Day Vawi 9-na puala Assembly Annexe, Aizawla inkhawm buatsaih a hmanpuinaah he thu hi sawiin Larsap chuan Ayurveda chu khawvel huapin miten inenkawl nan a tha tih pawmin an hmang uar hle a ti a. Tihdam hna thawh nan dan ang taka kalpui ram 24 an awm tih sawiin khawvela damdawi lam siam hmun lian hrang hrangin Ayurveda chu natna hrang hrang enkawl nan a tha tih an hmuchhuah mek tih a sawi a ni.

Larsap chuan Ayurveda damdawi hrang hrang chu ram 100 chuangah thawnchhuah tawh a ni a ti a. WHO leh Ministry of Ayush chu an thawk dun tha hle tih sawiin he thawhhona rahchhuah hmang hian Ayurveda kaihnawih inzirtirna leh hnathawh hrang hrang pawh huaihawt thin a ni a ti a. Mizoramah pawh Ayurveda chu mipuite hriselna kawnga pawimawh tak a nih zel theih nan chawinung zel turin kalkhawmte a sawm a ni.

GOVERNOR

He huna khualzahawm Health Minister Pi Lalrinpuii pawhin thu sawiin Ayurveda chu hmanlai thiamna mai ni lo, tunlaia damdawi lama harsatna sukiangtu pawimawh tak a la ni zel a ni a ti a. Mizoramah ramhmul damdawi a tam theih nan State Medicinal Plants Board in hma la nasa a ni a ti a. Sorkar scheme kalpui mek Bana Kaih-ah pawh ramhmul damdawi lam dah tel turin hma lak mek a ni tih sawiin Mizorama healthcare system-ah AYUSH chu sorkar damdawiin hrang hrang bakah AYUSH Health & Wellness Centre 41 bakah Integrated AYUSH Hospital, Thenzawlah te kalpui mek a ni a ti a, hei bakah hian helama zirbingna kalpui zel a ni tih a sawi bawk.

National Ayurveda Day puala hun hmanah hian Larsap chuan Article inziahsiaka ti tha te hnenah lawmman a hlan bawk a ni.



CM – ECONOMIC SUMMIT 2024

Chief Minister Pu Lalduhoma'n sawrkarna an chan tirhah leiba tam avanga sum harsa karah, renchem taka sum an enkawl avangin bill hrang hrang ba tam tak an pe thei ta tih a sawi.

Mizoram Economic Association buatsaih, Mizoram Economic Summit 2024, vawiina Aijal Club-a buatsaih a hmanpuinaah Chief Minister chuan, tun hmaa sorkarin RBI balance chhe tak a neih thin chu, renchem taka sum an enkawl avangin tun Financial Year tawpah kha chuan RBI Balance cheng vbc 500 chuang an nei ta a ti a, Healthcare sum ba te, Power Bill ba te an pe thei ta a, Power Bill ah pheih chuan

sum let, Rebate hmu hialin an ti tha ta a ti a, GP fund tam tham tak pek chhuah a nih bakah, Pension sum rei tak tang tawh te pawh chin fel a ni a, Election duty bill tang tam tak pek niin, sawrkar hnathawkte hlawh leh hamthatna, hun rei tak lo batsak tawh te pawh engemawzat chin fel a ni, a ti bawk.

CHIEF MINISTER

Chief Minister chuan sorkar laipuaia Minister of Road Transport & Highways Pu Nitin Gadkari hnenah Mizoram kawng chhia a ziaawm nan kawng siam dan phung thara kal an dil a ti a, kuminah Mizoram chhiatna tam tak a tawh avangin rikrum thilah sum hmanna tura an ruahman sa zawng zawng pawh hman a ngai thin a ti a. Mizoram kawng chungchang sawiin NHIDCL in kawng an laih fur khat daih lo a awm a ti a. Tuna kawng siam dan phung kalpui mek chu bituminous pavement a nih thu sawiin hei hian ti a ngam lo hle a ni a ti a. Fur a rei tual tual a, kawngsiam tura hnathawh theihna hun a tlem a, kum khatah thla 5 emaw lek kawng siamna hun a awm tih sawiin hemi thlak nan Mizoram sorkar emaw company dangte pawhin kawng siam hna an thawh tur reng rengah concrete hmanga kawng siam, rigid pavement hman chu sorkar laipuaiah dil a ni tih a sawi.

He hunah hian Mizoram sum leh pai dinhmun chungchang leh ram ei leh bar hmasawna tur hrang hrang te mithiamte kaihhruaina in sawiho a ni a, he hun buatsaihtu, Mizoram Economic Association te hi Mizoram University leh College a Economics Department-a thawktu leh zirlaite telna, economics lama tui apiangte tel theihna pawl a ni.

<><><>

OUTGOING CS MET CM

Chief Minister Pu Lalduhoma'n vawiin khan a pisa-ah naktipa Superannuation pension-a chawl tur Chief Secretary Dr. Renu Sharma kawmin Mizoram tana a hnathawh ah lawmthu a hrilh.

Pu Lalduhoma hian Chief Secretary hi a hun hman zel turah duhsakna a hlan a. Lawmthusawina lehkha leh thilpek a hlan a ni.

Dr. Renu Sharma chuan Mizoram chu nuam a tih thu leh a hriatreng thin tur thu a sawi a. Mizorama a awm chhunga tha taka thawhpuitu sawrkar leh sawrkar hnathawkte chungah lawmthu a sawi a ni.

Dr. Renu Sharma hian November ni 2, 2021 khan Mizoram Chief Secretary hna a rawn zawm a. Tun thla tawp hian Superannuation pension in a service a chawlhsan ve tawh dawn a, Chief Minister bakah hian sawrkar mi pawimawh hrang hrang ten an thlah a ni.

C. LALHMUNSANGI

Mizoram Chief Secretary Dr Renu Sharma pension huna thlaktu tur chungchangah hian Chief Minister Pu Lalduhoma chuan an duhdan sorkar laipuaiah an thlen tawh thu inrinni-a thuthar thehdarhtute a kawmna ah a sawi a,

Pu Lalduhoma chuan Mizoram Chief Secretary ni thei tur zingah duh an thlan theih nan AGMUT Cadre IAS zinga Chief Secretary dinhmun chelh thei te hming pe phawt turin a ngen tih a sawi a, tunah hian sawrkar laipuaia Ministry of Civil Aviation Secretary nilai Pu Vumlunmang Vualnam chu Mizoram Chief Secy a dah an beisei tih a sawi bawk a ni.

Manipur Cadre, 1992 IAS Batch chu Pu Vumlunmang Vualnam chu Mizoram Chief Secretary thar atan a dil a, Union Home Ministry-a Secretary hnenah an dilna hi thlenin, sawrkar laipuaia thuneituten an lo ngaihtuah zui dawn tiin an chhang tih a sawi.

<><><>

SUPPLY MINISTER

Vawiin khan Food, Civil Supplies & Consumer Affairs Minister Pu B Lalchhanzova chuan Indian Oil Corporation hotute a kawm a, Mizorama eirawngbawlina gas supply chungchang a sawipui.

Minister chuan Indian Oil Coorporation hotute chu Mizoramah kum dang zawng aia ruah a tam thu hrilhin hei hian ei leh bar chawk luhna kawngah harsatna hrang hrang a siam a ni a ti a. Hetihlaia Mizorama LPG Supply-ah harsatna lian a thleng lo chu lawmawm a tih thu sawiin hetiang dinhmun thleng tura Indian Oil Corporation Limited, LPG Distributor leh thawktu te zawng zawng inpekna ah lawmthu sawiin mipui tan a thahnemngai lehzuala thawhho puiah a sawm a ni.

Silchar Indane Divisional office-a Deputy General Manager & Head Pu Rajjyoti Das chuan Mizoram sawrkarin theihtawp a chhuahpuinaah lawmthu a sawi a. Mizo mipuiten hnianghnar taka LPG Supply an hmuh theih nan theihtawp an chhuah thin thu a sawi bawk.

Mizoram hian thla tin LPG Cylinder 6000-7000 a mamawh anga chhut a nih thu he hunah hian tarlan a ni a, hei hi truck 20-25 phur vel a ni a. Vawiin inkawmna hunah hian Mualkhang-a LPG Bottling plant siam thar mek chungchang leh Oil Depot din thuai a nih theih nana hmalak dan te sawi lan a ni bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theih a dah a ni.

ROZGAR MELA

Prime Minister Narendra Modia chuan vawiin khan Rozgar Mela-ah sawrkar hna hmu thar mi sing 5 leh sang 1 te hnenah appointment letter a hlan. Video Conference kaltlanga thusawiin Pu Modia chuan thalaite tan sawrkar hna nghet tam zawk siam turin hmalak a ni a ti a. Sawrkar chuan ramchhung thalaite tan eizawna siam turin theihtawp a chhuah a ni a ti bawk.

Kan Correspondent sawidanin Rozgar Mela hi ramchhung hmun 40 ah buatsaih a ni a. Vawina sawrkar hna hmu tharte hi Central sawrkara Ministry leh Department hrang hranga thawk tur an ni a. Heng hna hmu tharte hian iGOT Karmayogi portal kaltangin training an nei thei dawn bawk a ni.

<><><>

PM

Prime Minister Narendra Modia chuan vawiin khan New Delhi atangin health sector kaihhnawih hmasawna project cheng vaibelchhe sing khat sang hnih leh 850 hu a hawng. Prime Minister Modia ho hian Dhanvantri Jayanti leh Ayurveda Day vawi 9-na New Delhi-ah hian hman a ni a. Thusawiin PM Modia chuan ramchhunga healthcare kaihhnawih hmasawna ruhrelte chu sawrkarin a ngaih pawimawh anih thu a sawi a. Ram a hmasawn zel rualin khua leh tuite hriselna chu ngaih pawimawh tel a ngai a ti a. He hmahlir hian sawrkar chu a kaihruai a ti a. Pu Modia hian PM Jan Aushadhi Kendra 14,000 rampumah siam tawh a ni a ti bawk.

<><><>